

Rakyat kian tak selesa dengan warga asing

Berita Harian, 29 January 2014

Tinjauan IPS: Penduduk setempat lebih selesa gaul dengan rakan berlainan bangsa daripada warga baru sebangsa

RASA kurang selesa rakyat setempat terhadap warga asing semakin meluas, meskipun pada masa yang sama, tahap keselesaan antara bangsa dan agama tetap tidak berubah.

Semasa ditinjau, 32.1 peratus warga Singapura berpendapat sikap berprasangka antara mereka yang berbeza kerakyatan kian berleluasa hari ini berbanding lima tahun lalu.

Menurut tinjauan tersebut, keadaan itu lebih meruncing daripada jenis-jenis prasangka lain yang melibatkan bangsa, usia dan agama.

Contohnya, hanya 16 peratus responden berpendapat prasangka berkaitan kaum telah meningkat dalam lima tahun lalu berbanding 46.8 peratus yang merasakan keadaannya tidak banyak berubah.

Demikian dapatan tinjauan Institut Pengajian Dasar (IPS) mengenai isu kaum, bahasa dan agama di sini.

Melibatkan lebih 4,000 warga setempat, dapatan tersebut dibentangkan di sidang IPS Singapore Perspectives 2014 semalam.

Selain mencerminkan sikap penduduk di sini mengenai isu-isu kaum, bahasa dan agama, ia juga memberikan gambaran bagaimana sikap tersebut telah berubah.

Dalam ucapannya sebagai pembuka tirai sidang semalam, pengarah IPS, Encik Janadas Devan, berkata:

"Kini, umumnya perbezaan antara kaum, agama dan bahasa sudah dapat diatasi, namun muncul pula jurang yang semakin lebar antara mereka yang dilahirkan di negara ini dan warga asing," ujarnya.

Kaum Cina yang dilahirkan di sini, menurut Encik Janadas, lebih selesa dengan teman-teman Melayu dan India setempat berbanding teman Cina dari China.

Hakikat itu disokong tinjauan tersebut, yang menunjukkan 94 peratus responden berkata mereka lebih selesa bekerja dengan majikan Cina yang dilahirkan di sini, manakala jumlahnya berkurangan kepada 74 peratus bagi majikan warga baru dari China.

Justeru Encik Janadas berpendapat usaha yang lebih baik perlu untuk menyepadukan warga asing dengan masyarakat setempat.

Berkenaan isu diskriminasi kaum pula, tinjauan IPS itu mendedahkan ia dirasakan sebilangan anggota kaum minoriti dalam keadaankeadaan harian.

Dalam kalangan responden Melayu, 26.4 peratus percaya mereka merupakan mangsa diskriminasi di tempat kerja, manakala jumlahnya bagi kaum India pula ialah 24.2 peratus.

Segolongan kaum Cina, atau 5.7 peratus, juga merasakan diri mereka didiskriminasi.

Sementara itu, dari sudut akhlak atau moraliti pula, tinjauan tersebut mendapati masyarakat Singapura tetap sebuah masyarakat konservatif yang kurang senang dengan amalan-amalan seperti seks sebelum berumah tangga dan melahirkan anak luar nikah.

Dapatan berkaitan akhlak itu adalah tinjauan tambahan yang dilakukan IPS ke atas responden yang sama.